

## **Il project victur per la renovaziun dal center da dietas Plantahof è erui**

**A la cuminanza da lavur Nickisch Walder, architects, Flem, e Planalytik ScRL, Flums, vegnan surdadas las lavurs per planisar e per renovar il center da dietas dal CFCA Plantahof a Landquart.**

Il center da furmaziun e cussegliaziun agricula Plantahof a Landquart (CFCA Plantahof) è – sco institut agricul – ina instituziun d'impurtanza surregionala. Ultra dal manaschi agricul e da la scolaziun e da la furmaziun supplementara èn er la perscrutaziun d'allevament e la cussegliaziun champs d'activitad impurtants dal CFCA Plantahof. Grazia a quests champs d'activitad è il CFCA Plantahof er sa sviluppà ad in center da dietas impurtant.

### **Ulteriur svilup tenor in plan da basa**

L'areal dal CFCA Plantahof è creschì durant blers decennis e cumpiglia oz circa 20 edifizis. Per sclerir differents ulteriurs svilups dal manaschi e da l'architettura dal CFCA Plantahof è vegnì fatg l'onn 2008 in plan da basa, tenor il qual ils futurs projects da construcziun ston vegnir orientads ad ina idea generala, e tenor il qual l'identitad da l'entir complex duai vegnir rinforzada. Cun l'avertura da l'auditori Weber l'onn 2011 e cun l'entrada en funcziun da la nova stalla da muvel grond l'onn 2014 èn vegnidas realisadas duas ovras sin fundament da quest plan da basa.

### **Grond basegn da renovaziun**

Actualmain exista in basegn da renovaziun considerabel tar la chasa da scola, tar l'alloschi da las emprendistas e dals emprendists (convict), tar la sala da mangiar sco er tar la cuschina. Particularmain la sala da mangiar e la cuschina èn indrizs centrals dal CFCA Plantahof en sia funcziun sco center da dietas. La reparaziun necessaria da quests edifizis è ina gronda schanza per eliminar l'entretschament dal manaschi creschì durant ils onns e per part dischavantagius, e per dar ina identitad a l'instituziun en sia totalitad. In'ulteriura finamira è quella da realisar ils basegns dals utilisaders futurs. Per renovar il center da dietas (senza la chasa da scola) dal CFCA Plantahof è vegnida publitgada ina concorrenza da projects selectiva.

### **L'edifizis duai avair in aspect unitar**

La finamira da la concorrenza da projects selectiva è stada quella d'evaluar in biro d'architettura ch'è qualifitgà da sviluppar in project che resguarda l'architettura locala, che persvada areguard sia funcziun e ch'è energeticamain util. Plinavant duai il project vegnir realisà en la qualidad giavischada sco er observar las prescripziuns pertutgant ils custs ed ils termins. In punct central dal program da concorrenza è stà quel da mantegnair ina diversitad d'ideas uschè vasta sco pussaivel. Cunzunt er areguard la soluziun pertutgant l'architettura locala e l'aspect unitar da l'edifizis cumbinà cun quai.

### **"FLORA" è sa profilada**

Da 31 candidaturas èn vegnidas tschernidas 12 per l'elavuraziun d'in project proponì. Ils projects da concorrenza èn vegnids validads en furma anonima. La giuria è sa decidida per il project cun il pled-clav "FLORA" da la cuminanza da lavur Nickisch Walder, architects, Flem, e Planalytik ScRL, Flums.

Il project "FLORA" sa distingua pervia da ses cubus simpels che mainan quietezza ed in bun urden en l'areal creschì, e quai grazia ad in concept persvadent per l'architettura locala. Ils

## **Servetsch da medias, chanzlia chantunala dal Grischun, 7000 Cuir**

auturs dal project han persvadì la giuria cun lur idea che na meglierescha betg mo cleramain l'adressa dal Plantahof, mabain ch'ordinescha en moda precisa e cun auta qualitat e structurescha duraivlamain ils spazis exteriurs ed intermediars da l'institut.

### **Ulteriur proceder**

Cun il consentiment da la regenza vegn il project sviluppà vinavant ed i vegn elavurada ina missiva per mauns dal cussegl grond. Il conclus è suttamess al referendum obligatoric. La planisaziun da construcziun e la realisaziun èn previsas per l'onn 2019. Ils projects proponids èn exponids en il foyer da la sala dals allevaturs (tract da la chasa da scola) tar il CFCA Plantahof a Landquart da venderdi, ils 2 fin mesemna, ils 14 da favrer 2018. L'exposiziun è accessibla mintgamai durant ils lavurdis da las 07.30 fin las 17.00.

### **Agiuntas:**

rapport da la giuria

### **Infurmaziuns:**

- president da la regenza dr. Mario Cavigelli, schef dal departament da construcziun, traffic e selvicultura, tel. 081 257 36 01, e-mail [Mario.Cavigelli@bvfd.gr.ch](mailto:Mario.Cavigelli@bvfd.gr.ch)
- Markus Dünner, architect chantunal, uffizi da construcziun auta, tel. 081 257 36 31, e-mail [Markus.Duenner@hba.gr.ch](mailto:Markus.Duenner@hba.gr.ch)

Gremi: uffizi da construcziun auta dal Grischun

Funtauna: uffizi da construcziun auta dal Grischun

Data 1. da favrer 2018